



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**25. Kalenderwoche – ab 21. Juni 2009**

## Kadz un Maus

Mei Kumbl had ne Kadze, also genauor gesachd - een Kador! Dähr heeßd Eddi. Das is abor Zufall, das had nischd mid mir zu dun – mei Kosenname is ja nisch Eddi, sondorn Ede. Abor eischendlich heeßn mir dadsäschlich alle beede Eduard. Wobei nadihrlisch Eduard fiehr een Kador e ziehmlisch doofor Name is. Fiehr misch als Mann is Eduard durschaus e Name, dähn isch als Name agzebdiern kann. Gerufn werd isch abor meisdens Ede.

Un dähr Kador von meim Kumbl dähr wird also Eddi gerufn. Ob dähr dann ooch werglich komm dud, wenn eenor „Eddi“ rufd, das dud off eim annorn Bladd schdehn. Wenn misch meine Gudste rufn dud... - nee, das geb isch zu - manschma bin isch e bißl boggisch.

Ja, un dor Eddi is ooch manschma boggisch, had mei Kumbl erzähld. Dähr dud ooch vorsuchn sein eischnen kleen Kadznkobb durschzusedzn. So wie ehm isch bei meinor Gudstn.

Bei mir is dor Erfolsch meinor Bemiehungen sähr unnorschiedlich. Ma so, ma so.

Dähr Kador von meim Kumbl is da hardleibischor. Eh dähr nachgähm dud, da musses dann schon rischdisch ernsd wern. Solange da eenor bloß rummeggorn dud, das machd dähm Eddi nischd aus. Da dud dähr dasidzn, sachd mei Kumbl, un guggd bloß vorwundord. Jednfalls had mei Kumbl jedzde ma erzähld... da hadde sisch dor Eddi in Ergänzung von seim ieblichn Ahmdbrod, wassor immor aus dor Bichse krischd... „kiddekadde“ odor so... da had dähr sisch also eene Maus gefang un hadse ausm Gardn mid reingebrachd. Wahrscheinlich had sisch dor Eddi die Maus als Nachdisch offhehm wolln.

Mei Kumbl hadde das gesähn un had nu off dähn Eddi eingeschimbfd, dassor die Maus widdor nausbring soll. Abor dor Eddi hädde mid dor Maus im Maul dagesessen un hädde ehm so geguggd, wie or immor guggn dud – sähr vorwundord. Un wo ne mei Kumbl fang un samd Maus an de frische Lufd befördorn wollde, da is mei Eddi ershdema abgehaun un had de Maus freigegähm. Im Wohnzimmor. Nu had mein Kumbl dähn Eddi mid Nachdrugg offgefordord, dassor seine Maus widdor einfang soll.

Abor eene Maus is ja ooch nisch bleede. Die is abgehaun. Unnersch Sofa. Die hadde keene LUSD, dor Nachdisch fiehrn Eddi zu sein. Un das kammor aus dor Sischd von eenor Maus ja ooch begreifn. Schließlich had dor Eddi vorsuchd, mid seim diggn Kobb unnorsch Sofa zu komm. Das haddor abor nisch geschaffd. Dor Abschdand zwischn Sofa un Fußbodn war zu kleen. Da had mei Kumbl das Sofa leischd angehohm, damid dor Eddi an sein Nachdisch rankomm konnde... abor die Maus war weg. So e Sofa had ja innwendisch jede Menge gude Vorschdegge fiehr eene Maus.

Das Ende vom Lied is nu – dass mei Kumbl außor dähm Kador ooch noch eene Maus had, die irschendwo im Sofa nisedd. Nee, isch darf mir nisch vorschdeln, wenn isch daheeme bei uns eene Maus eingeschlebbd hädde... Isch hädde beschdimmd zum Ahmdbrod kee Bier gekrischd.

**Eduard Sachsenmeyer**